

आकाशवाणी जयपुर-अजमेर

दिनांक 15.11.2025

समय: 18.45 बजे

समाचार

- जनजातीय स्वतंत्रता सेनानी, धरती आबा बिरसा मुंडा री डोढ़ सौ वीं जयंती रे मौके आज वां ने सिरधाभाव सागे याद करी ज्या-प्रधानमंत्री नरेन्द्र मोदी कह्यो-देश री आजादी री लड़ाई मांय जनजातीय समाज रा योगदान ने हमेशा याद कर्यो जावेला।
- जनजातीय गौरव दिवस रे मौके राज्य मांय न्यारा-न्यारा कार्यक्रम राख्यी ज्या-डूंगरपुर मांय व्ह्या राज्य स्तर रा जळसा मांय मुख्यमंत्री भजनलाल शर्मा केई सौगातां दीनी।
- फौज री सप्त शक्ति कमान री रणबांकुरा डिवीजन रो महाजन फील्ड फायरिंग रेंज मांय युद्धाभ्यास पूरो व्ह्यो।

अर

- प्रदेश मांय पारो उत्तरण ऊं ठण्ड रो असर बध्यो।

000

जनजातीय स्वतंत्रता सेनानी, धरती आबा बिरसा मुंडा री डोढ़ सौ वीं जयंती रे मौके आज वां ने सिरधाभाव सागे याद करी ज्या। राष्ट्रपति द्रौपदी मुर्मू, उपराष्ट्रपति सी.पी. राधाकृष्णन अर लोकसभा अध्यक्ष ओम बिरला वां ने संसद भवन मांय फूल चढ़ा र याद कीना। ई मौके आज आखा देश मांय जनजातीय गौरव दिवस मणायी ज्यो। ई मौके प्रधानमंत्री कह्यो के देश री आजादी री लड़ाई मांय जनजातीय समाज रा योगदान ने हमेशा याद कर्यो जावेला। प्रधानमंत्री जनजातीय महामानव बिरसा मुंडा री जयंती रे मौके आज गुजरात रा नर्मदा जिला रा डेडियापाड़ा मांय राख्यी ज्यी सभा ने ई सम्बोधित कीनी। वे कह्यो के जनजातीय समाज हमेशा देश रा भला सारु काम कीनो।

प्रधानमंत्री कह्यो के आज श्री गोविंद गुरु पीठ जनजातीय भाषा संवर्धन केंद्र ई सरु करी ज्यो है, जठे जनजातियां री बोलियां रा बारा मांय पढ़ाई-लिखाई करायी जावेला। श्री मोदी कह्यो के जनजातियां ऊं जुड़ी कहानियां अर गीतां ने ई ई केंद्र मांय हेर र राख्या जावेला। प्रधानमंत्री कार्यक्रम मांय 9 हजार करोड़ रुपया ऊं बत्ती रकम रा खर्च वाळी विकास री न्यारी-न्यारी योजनावां रा काम री नींव रख्यी अर पूरा व्ह्या काम जनता ने संप्या। भगवान बिरसा मुण्डा री जयंती आज जनजातीय गौरव दिवस रा तौर ऊं मनायी जा रही है। ई मौके राज्य मांय ई न्यारा-न्यारा कार्यक्रम राख्यी ज्या। मुख्यमंत्री भजनलाल शर्मा डूंगरपुर

मांय राख्खी ज्या राज्य स्तर रा जनजातीय गौरव दिवस समारोह मांय 87 करोड़ रुपया रा खर्च वाळा विकास रा कामां री सरुआत कीनी अर पूरा व्ह्या काम जनता ने सूंप्या। ई मौके वे किसानां रा खातां मांय खास सरकारी योजनावां रा तैत अनुदान री रकम भेजी। मुख्यमंत्री नौजवानां सारु कौशल प्रशिक्षण कार्यक्रम, 3 जिलां मांय आरएस-सीआईटी कोर्स अर विद्यार्थियां सारु आवासीय बैच री सरुआत ई कीनी। श्री शर्मा विद्यार्थियां सारु पोशाक अर स्टेशनरी री खरीदी बाबत रकम ई दीनी। वे जनजाति योजना अर साहित्य ऊं जुड़ी दो पत्रिकावां रो विमोचन कीनो अर चोखा काम करण वाळा अर भणार्ई-लिखार्ई मांय अव्वल रेहवण वाळां ने जनजाति गौरव सम्मान अर जनजाति प्रतिभा सम्मान दे र नवाजा। मुख्यमंत्री गुजरात रा डेडियापाड़ा मांय प्रधानमंत्री नरेन्द्र मोदी री मौजूदगी मांय राख्खी ज्या जनजाति गौरव दिवस कार्यक्रम मांय वीडियो कॉन्फ्रेंसिंग रे मार्फत भाग लीनो।

बाड़मेर मांय पशुपालन मंत्री अर जिला रा प्रभारी जोराराम कुमावत शोभायात्रा ने हरी झंडी बता र रवाना कीनी। राजसमंद मांय निकाली ज्यी शोभायात्रा मांय जनजातीय कलाकार नाच-गाण रा कार्यक्रम पेश कीना। ई मौके राख्खी ज्या जळसा मांय आदिवासी समाज रा 50 परिवारां ने जमीं रा पट्टा देवण री मंजूरी दीरीजी। पाली मांय जिला रा प्रभारी मंत्री झाबर सिंह खर्वा बिरसा मुंडा री तस्वीर माथे सिरधा रा फूल चढ़ाया। करौली मांय राख्खी ज्या कार्यक्रम मांय गृह राज्यमंत्री जवाहर सिंह बेढ़म ई मौजूद रह्या। अजमेर, बारां, सिरौही, बांसवाड़ा अर बालोतरा समेत न्यारी-न्यारी ठोड़ां राख्खी ज्या कार्यक्रमां मांय भगवान बिरसा मुंडा री हिम्मत, संघर्ष अर देश री आजादी अर जनजातियां रा हकां री हिफाजत सारु करी ज्या जतन ने याद करी ज्या।

000

स्वास्थ्य मंत्रालय री ओर ऊं चलायी ज्यी अमृत पहल रा आज 10 साल पूरा व्हे गया है। ई मौके स्वास्थ्य मंत्री जगत प्रकाश नड्डा नई दिल्ली मांय कह्यो के लारला दस साल मांय मरीजां री करीब साढ़े आठ हजार करोड़ रुपया री बचत व्ही। वे कह्यो के ई योजना रा तैत आवण वाळी दुकानां दवाइयां, प्रत्यारोपण अर दूजी सामग्रियां समेत साढ़े छह हजार ऊं बत्ती भांत री सामग्री माथे 50 फीसदी तांई री छूट देवे है। ई मौके श्री नड्डा देश मांय दवाइयां री 10 नुवी अमृत दुकानां रो उद्घाटन कीनो।

000

राज्यपाल हरिभाऊ बागडे कह्यो है के देश रा मजूरां रा मोटा योगदान रे पाण भारत मोटी माली ताकत रा रुप मांय दुनिया री चौथी मोटी माली व्यवस्था बण ग्यी है। राज्यपाल आज बीकानेर रा गंगाशहर मांय भारतीय परिवहन मजदूर संघ रा अखिल भारतीय अधिवेशन मांय बोल रह्या हा। वे मजूरां ने देश रा विकास रो केन्द्र बतायो।

000

फौज री सप्त शक्ति कमान री रणबांकुरा डिवीजन री ओर ऊं बीकानेर री महाजन फील्ड फायरिंग रेंज मांय करी ज्यो युद्ध अभ्यास पूरो व्हे ग्यो है। इण रो मकसद फौज री युद्ध परिचालन दक्षता री जांच करणो हो। सप्त शक्ति कमान रा कमांडर लेफ्टिनेंट जनरल मनजिंदर सिंह अभ्यास री कार्यवाही रो जायजो लीनो। अभ्यास रे दौरान देश री हिफाजत सारु लड़ाई ऊं जुड़्या काम ने और बेहतर बणावण अर आपसी तालमेल री जांच करीजी। ई अभ्यास मांय तोपखाना, मैकेनाइज्ड फोर्सिंग, एयर डिफेंस, आर्टिलरी, इंजीनियर्स अर लॉजिस्टिक्स शामिल व्ही।

000

कोटा मांय राष्ट्रीय कृषि अनुसन्धान परिषद्—आईसीएआर रे मार्फत प्राकृतिक खेती रा बारा मांय अनुसंधान कर्यो जावेला। **राजस्थान से विशेष** मुद्दा माथे आधारित आ परियोजना देश री 5 बेहतरीन परियोजनावां मांय शामिल है। कृषि वैज्ञानिक पवन कुमार टांक बतायो के ई परियोजना रा तैत कोटा संभाग मांय खेती—बाड़ी ऊं जुड़ी उत्पादकता, गुणवत्ता रा बारा मांय काम कर्यो जावेला।

000

केंद्रीय संस्कृति अर पर्यटन मंत्री गजेन्द्र सिंह शेखावत आज जोधपुर कने बालेसर मांय सांसद खेल महोत्सव रा तैत ब्लॉक स्तर री होड़ां रो उद्घाटन कीनो। ई मौके वे नौजवानां ने देश री सब ऊं ऊर्जा वाळी ताकत बताता थकां कह्यो के नौजवान ज्यीं संकल्प अर सकारात्मकता सागे आगे बधेला, वा ई भारत रा भविष्य ने नुवी ऊँचाइयां ताई पूगावेला। वे कह्यो के ओ आयोजन केवल खेलां री होड़ व्हेवण सागे ई नौजवानां री सहभागिता अर देश बणावण री दिशा मांय खास पहल है। ई होड़ मांय करीब डोढ़ हजार खिलाड़ी भाग ले रह्या है।

000

प्रदेश मांय ठंड रो असर धीरे—धीरे बधबा सागे दिन अर रात रा तापमान मांय लगातार गिरावट आ रही है। लारली रात सीकर ज़िला रा फतेहपुर मांय सब ऊं कम 5 डिग्री सेल्सियस न्यूनतम तापमान नापी ज्यो। सीकर मांय 5 दशमलव 4, नागौर मांय 6 दशमलव 1, दौसा मांय 6 दशमलव 9, अंता मांय साढ़े 7 अर चूरु मांय 7 दशमलव 9 डिग्री सेल्सियस कम ती कम तापमान रिकॉर्ड करी ज्यो। घणखर ठोड़ां दिन री बगत पारो 25 ऊं 30 डिग्री सेल्सियस बीचे चाल रह्यो है। मौसम विभाग आज अजमेर, सीकर अर टोंक मांय सीळो बायरो बाजण रा आसार जताया है। सीकर मांय काल ई सीळो बायरो बाजण सारु चेतायी ज्यो है। मौसम केन्द्र जयपुर रा निदेशक राधेश्याम शर्मा आकाशवाणी ने बतायो के आवता एक सप्ताह मांय पारो और उतरण रा आसार है।

000

लौह पुरुष सरदार वल्लभ भाई पटेल री डोढ़ सौ वीं जयंती रा सिलसिला मांय चाल रह्या कार्यक्रमों रा तैत आज झुंझुनूं ज़िला रा चिड़ावा मांय यूनिटी मार्च निकाली ज्यो। युवा अर खेल मंत्रालय अर जिला प्रशासन री ओर ऊं राख्यी ज्यो ई कार्यक्रम मांय मोटी तादाद मांय विद्यार्थी, एनएसएस, एनसीसी अर स्काउट—गाइड रा सदस्य शामिल व्ह्या। कार्यक्रम मांय नौजवानां ने विकसित अर खुद रे पाण ऊबो भारत बणावण रो संकल्प ई दिरायी ज्यो।

000

राजस्थान माध्यमिक शिक्षा बोर्ड री ओर ऊं राज्य स्तर री प्रतिभा खोज परीक्षा काल सगळा ज़िलां मांय संवारे 9 ऊं दोपहरां पाछे 1 बज्यां ताई ली जावेला। बोर्ड रा सचिव गजेन्द्र सिंह राठौड़ आ जाणकारी दीनी। वे बतायो के प्रवेश पत्र बोर्ड री वेबसाइट ऊं डाउनलोड कर्या जा सके है।

000